

## Gift-hulle wil staal wys in Afrika

**Wim Pretorius**

Net 'n dag nadat Atletiek Suid-Afrika (ASA) sy span vir die Wêreld-jeugkampioenskap vir o.18's aangekondig het, het hy ook 'n sterbelaaide groep vir Afrika se junior kampioenskap bekend gemaak.

Altesaam 44 atlete – 30 mans en 14 vroue – is gekies ter voorbereiding op die byeenkoms, wat op 29 Junie in Tlemcen, Algerië, beslis word. Die finale groep sal gefinaliseer word kort voordat die span op die vliegtuig klim.

Gift Leotlela, Clarence Munyai, George Kusche, Burger Lambrechts jr., Taylon Bieldt en Simone van der Nest is maar net 'n handjievol van die uitblinkers in die groep.

Leotlela het vanjaar reeds twee keer 10.12 sek. in die 100 m gehardloop en sal 'n sterk medaljegansteling op die Afrika-kampioenskap wees. Dié tyd plaas hom eerste op

die Internasionale Vereniging van Atletiekfederasies (IAAF) se junior ranglys vir 2017. Mthembu Monareng (10.34 sek.) sal ook die keurders wil wys waarom hy beskik. Sy tyd plaas hom in die agtste plek op dié ranglys.

Munyai, Afrika-rekordhouer in die 200 m en Leotlela se Olimpiese spanmaat, sal ook dié vertoning wil herhaal. Munyai en Leotlela hou tussen hulle tans die vyf vinnigste tye vanjaar vir junior atlete in dié item. Munyai is in die voorste plek op die wêreldranglys met 20.10 sek., wat hy by Tuks opgestel het, terwyl Leotlela ook reeds 20.20 sek. op die stophorlosie gehardloop het.

Net soos die twee kortafstandblitse is Kusche ook een om dop te hou. Hy het in Durban in die 1 500 m die beste tyd vir juniors ter wêreld gehardloop toe hy dié item binne 3:41.18 kafgedraf het. Hy is voorlopig op die lys om Suid-

Afrika in die 800 m en die 1 500 m te verteenwoordig.

Lambrechts, wat tans tweede op die junior ranglys is vir gewigstoot, sal ook kans kry om sy staal te wys. Hy spog reeds met 'n afstand van 20.44 m vanjaar, met net Jamaika se Kevin Nedrick (20.65 m) wat al verder gegooi het.

Kyle Blignaut, wat sesde op die ranglys is met 20.15 m, is ook in die groep.

Wat die vroue betref, sal Bieldt, wat die nasionale junior rekordhouer in die 100 m-hekkies is, wil verbeter op die sewende plek wat sy verlede jaar op die Wêreldbyeenkoms vir juniors in Bydgoszcz, Pole, behaal het. Haar beste tyd vanjaar was 13.80 sek.

Van der Nest sal wil vergoed vir haar vertoning op die Suid-Afrikaanse byeenkoms vir seniors, waar sy in die halfeindronde van die 100 m gediskwalifiseer is. Sy het in die uitdunne 11.87 sek. gehardloop.



Clarence Munyai in April in aksie in die 200 m by die SA byeenkoms vir seniors in Potchefstroom.

Foto: GALLO IMAGES